



Broj: 01-___/25
Vareš, _____ 2025. godine

NACRT

Obrađivač:
Služba za prostorno uređenje
Sanitarni inspektor

Na osnovu člana 8. Zakona o principima lokalne samouprave u FBiH („Službene novine Federacije BiH“, broj: 49/06 i 51/09), člana 12. Zakona o vodama Zeničko-dobojskog kantona („Službene novine Zeničko-dobojskog kantona“, broj: 17/07) i člana 22. Statuta Općine Vareš-prečišćeni tekst 01-162/12 od 11.09.2012.godine, Općinsko vijeće na sjednici ____ održanoj dana ____ . ____ . 2025.godine, d o n o s i:

ODLUKU

o mjesnim vodovodima na području općine Vareš

1. OPĆE ODREDBE

Član 1.

Ovom odlukom propisuje se način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području općine Vareš.

Član 2.

Vodni objekti koji služe za vodosnabdjevanje vodom za piće izvan općinskih sjedišta su mjesni vodovodi, javne česme i javni bunari.

Član 3.

- (1) Mjesnim vodovodom u smislu ove odluke smatra se vodni objekat koji služi za snabdjevanje vodom za piće jednog ili više seoskih naselja izvan gradskog sjedišta, koji ima zaštićeno izvorište, kaptažu, rezervoar, razvodnu mrežu i ostale objekte.
- (2) Javnim bunarom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služe za snabdjevanje vodom za piće najmanje dva domaćinstva u seoskom naselju.

- (3) Javnom česmom u smislu ove odluke smatra se vodni objekat sa odgovarajućom zaštitnom zonom i odgovarajućim uređajima koji služe za snadbjevanje vodom za piće stanovnika i prolaznika, a može biti izgrađena i van naselja.
- (4) Infrastruktura mjesnog vodovoda obuhvata sljedeće vodne objekte: vodozahvatni objekti, kaptaže, bunari, pumpne stanice, potisni cjevovodi, rezervoari, dovodni cjevovodi, razvodna mreža sa zasuknim oknima. Na priključku za svako domaćinstvo trebaju biti ugrađeni vodomjeri- član 4.stav (6) ove odluke.
- (5) Unutrašnjim instalacijama- smatraju se sve instalacije od vodomjera do posljednje izlivne jedinice, a u slučajevima gdje nije ugrađen vodomjer- od mjesta priključka na vodovodnu mrežu.
- (6) Korisnik vode (u daljem tekstu: Korisnik)- je svaka fizička ili pravna osoba koja je s Upravnim odborom ili Odborom za vodu sklopila Ugovor o isporuci vode, kao i svaka fizička ili pravna osoba koja koristi nekretninu priključenu na mjesni vodovod, bilo da svoje pravo korištenja nekretnine temelji na valjanoj pravnoj osnovi (najmoprimac, podnajmoprimac, stanar, zakupac, podzakupac), bilo da se bez valjane pravne osnove koristi nekretninom. Korisnik je, u kontekstu Zakona o zaštiti potrošača, izjednačen sa potrošačem.
- (7) Građevinski odbor za izgradnju vodovoda je organ od najmanje tri člana kojeg imenuju sva lica koja učestvuju u izgradnji vodovoda, većinom glasova.
- (8) Odbor za upravljanje i održavanje vodovodom- je organ kome vlasnici vodovoda nakon izgradnje povjeravaju poslove upravljanja i održavanja vodovoda.

Član 4.

- (1) Izvorišta voda koja se zahvataju radi snadbjevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se su svako doba godine moglo obezbjediti neprekidno snadbjevanje vodom stanovništva.
- (2) Kapacitet rezervoara mjesnog vodovoda treba da obezbjedi dovoljnu količinu vode za dnevnu potrošnju korisnika i rezervu za gašenje požara.
- (3) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on na drugi način ne može riješiti snadbjevanje vodom.
- (4) Ukoliko je dovoljan kapacitet izvorišta, a profil cijevi ne dozvoljava mogućnost novih priključaka, finansiranje izmjena postojećeg profila cijevi vrši se po odluci Odbora građana iz prikupljenih sredstava održavanja.
- (5) Kaptaža i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.
- (6) Mjesni vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara, a ako ima više odvoda iz rezervoara, na svakom odvodu.

II- IZGRADNJA MJESNIH VODOVODA I JAVNIH ČESMI

Član 5.

- (1) Investitor za izgradnju mjesnog vodovoda može biti Općina Vareš, mjesna zajednica, grupa građana ili građanin.
- (2) Investitor izgradnje javne česme može biti mjesna zajednica, grupa građana ili građanin, a odluku o izgradnji javne česme donosi mjesna zajednica.

- (3) Ako je investitor grupa građana ili građanin, izgradnja javne česme se vrši uz suglasnost mjesne zajednice, koja je dužna da obezbijedi njeno održavanje.

Član 6.

- (1) Vodovodi koji su izgrađeni iz sredstava općine/grada, kantona, federacije i drugih institucija u dijelu više od ½ uloženi sredstava, uključujući troškove za naknadna proširenja i rekonstrukcije mogu se predati na upravljanje komunalnom preduzeću, uz suglasnost nadležne općinske Službe za poslove vodoprivrede.
- (2) Uložena vlastita sredstva korisnika, komunalno preduzeće će kompenzirati isporukom vode bez naplate za period koji će pokrивati troškove vlastitih ulaganja građana.
- (3) Zahtjev za rekonstrukciju mjesnih vodovoda, mogu podnijeti samo oni vodovodi koji imaju vodnu dozvolu.

Član 7.

- (1) Investitor je dužan izabrati Građevinski odbor za izgradnju vodovoda (u daljem tekstu: Građevinski odbor), a imenovanje istog potvrđuje mjesna zajednica.
- (2) Aktom o imenovanju Građevinskog odbora određuje se predsjednik i zamjenik, koji su po funkciji zajednički predstavnici investitora i ovlašteni su za zaključivanje i potpisivanje svih akata čije donošenje je obavezno u postupku izgradnje vodovoda (angažovanje stručnih firmi za provjeru lokaliteta izvorišta, pribavljanje vodnih akata, akata iz oblasti prostornog uređenja i građenja, rješavanje imovinsko-pravnih odnosa pribavljanjem saglasnosti vlasnika svih parcela preko kojih vodovod prolazi i svih ostalih akata i saglasnosti).
- (3) Aktom iz prethodnog stava utvrđuje se mandat, prava i obaveze Građevinskog odbora u skladu sa ovom odlukom, s tim da mandat predsjednika i članova Građevinskog odbora može trajati najduže dvije godine uz mogućnost ponovnog imenovanja.
- (4) Prava i obaveze Građevinskog odbora traju do okončanja radova na izgradnji vodovoda, odnosno do imenovanja Odbora za upravljanje i održavanje vodovoda.

Član 8.

Prava i dužnosti Građevinskog odbora za vodu su:

- pribavljanje svih zakonom propisanih akata potrebnih za izgradnju i rekonstrukciju,
- organizovanje potpisivanje Ugovora koji u ime domaćinstva korisnika potpisuje nosilac domaćinstva,
- vođenje evidencije o učešću o izgradnji svakog pojedinca, prikupljenim ili utrošenim novčanim sredstvima i drugim podacima koji su važni za izgradnju i kasnije korištenje objekta,
- donošenje odluke o cijeni priključka na novi vodovod na osnovu raspoložive dokumentacije o ulaganjima korisnika vodovoda za izgradnju mjesnog vodovoda,
- da nakon završetka radova podnese pismeni izvještaj Savjetu mjesne zajednice,
- da odredi cijenu vode isporučene iz mjesnog vodovoda.

Član 9.

- (1) Izgradnja i rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti.
- (2) Vodna saglasnost izdaje se pod uslovima propisanim zakonom i podzakonskim aktima a izdaje općinska služba nadležna za poslove iz oblasti voda.

Član 10.

- (1) Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju, odnosno građenju, pribavlja se vodna dozvola.
- (2) Uz zahtjev za izdavanje vodne dozvole za mjesni vodovod, za koji su investitori grupa građana, podnosi se i pismeni ugovor iz člana 3.stav (6) ove odluke.
- (3) U slučaju da do donošenja ove odluke ne postoji Odbor za vodovod, predsjednik Savjeta mjesne zajednice je dužan da u roku od 30 dana isti uspostavi.
- (4) Ukoliko korisnik ne želi potpisati pismeni ugovor smatra da je odustao od prava na vodovod, te se takvom korisniku voda može isključiti.

Član 11.

- (1) Rekonstrukcija vodovoda vrši se na način i po postupku predviđenom za izgradnju vodovoda.
- (2) Zahtjev za rekonstrukciju vodovoda mogu podnijeti samo oni vodovodi koji imaju vodnu dozvolu.

III- KORIŠTENJE, UPRAVLJANJE I ODRŽAVANJE VODOVODA, JAVNE ČESME I JAVNOG BUNARA

Član 12.

- (1) Voda se mora koristiti racionalno i ekonomično. Svaki korisnik vode je dužan koristiti se vodom na način i u obimu kojim se voda čuva od rasipanja i štetnih promjena njenih osobina i omogućuje zakonsko pravo korištenja vode drugim licima.
- (2) Građani koji su vodovod izgradili vlastitim sredstvima dužni su da trajno obezbjeđuju potrebna financijska sredstva i druge uslove za održavanje i funkcionisanje tih objekata u skladu sa njihovom prirodom i namjenom, i za vršenje minimalnog broja propisanih pregleda zdravstvene ispravnosti vode za piće iz tih objekata.

Član 13.

- (1) Izvorišta voda koja se zahvataju radi snadbjevanja vodom za piće stanovništva putem vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbjeđiti neprekidno snadbjevanje vodom stanovništva.
- (2) Kapacitet rezervoara vodovoda treba da obezbjeđi dovoljnu količinu vode za dnevnu potrošnju korisnika i rezervu za gašenje požara.
- (3) Izuzetno nadležni organ će investitoru izdati potrebne vodne saglasnosti i kad izvorišta nemaju dovoljne količine vode, ukoliko on ne može na drugi način riješiti snadbjevanje vodom.
- (4) Ukoliko je dovoljan kapacitet izvorišta, a profil cijevi ne dozvoljava mogućnost novih priključaka, finansiranje izmjena postojećeg profila cijevi vrši se po odluci Odbora za održavanje i upravljanje vodovodom iz prikupljenih sredstava održavanja.
- (5) Kaptaža i rezervoari koji su, u smislu zakona i ove odluke, sastavni dio vodovoda, a koji služe za prihvatanje i akumuliranje vode za piće moraju imati propisane izolacije i ostale uređaje i opremu za popravku kvalitete vode (bistrenje, dezinfekcija i slično), ukoliko se u zavisnosti od izvršene analize vode pojavi potreba za korištenje istih. Opremom i uređajima za popravku kvalitete vode trebaju rukovati stručna lica sa kojima korisnici vodovoda sklapaju poseban ugovor.
- (6) Vodovod mora imati ugrađen i propisno baždaren uređaj za mjerenje količine iskorištene vode na odvodu iz rezervoara, a ako ima više odvoda iz rezervoara na svakom odvodu.

- (7) Na priključku za svako domaćinstvo mora biti ugrađen vodomjer, a rok za ugradnju je jednu godinu (1) od dana na stupanju na snagu odluke.

Član 14.

- (1) U periodu hidrološkog minimuma (sušni period) za mjesne vodovode koji nemaju dovoljnu količinu vode, Odbor za upravljanje i održavanje vodovoda donosi odluku o uvođenju redukcije vode.
- (2) U periodu primjene odluke o uvođenju redukcije vode zabranjena je upotreba vode iz mjesnog vodovoda za sve druge potrebe osim za piće i sanitarne potrebe.
- (3) Maksimalna dnevna potrošnja vode u tom periodu po članu domaćinstva je 100 litara.
- (4) U periodu ekstremne suše dnevna potrošnja vode po članu domaćinstva može biti i manja, što utvrđuje svojom odlukom Odbor za upravljanje i održavanje vodovoda.

Član 15.

- (1) Licima koja nisu učestvovala u izgradnji mjesnog vodovoda, može se odobriti priključak na vodovod, ukoliko vodovod obzirom na količinu vode na izvorištu, može zadovoljiti povećan broj korisnika i ako se njihovo snadbjevanje vodom za piće ne može obezbjediti na drugi ekonomičan i racionalan način.
- (2) Lice kome je vodnom saglasnošću odobreno priključenje na mjesni vodovod, dužno je prije priključenja, odnosno korištenja vode, putem ugovora sa vlasnicima mjesnog vodovoda regulisati plaćanje srazmjernog dijela troškova izgradnje vodovoda i srazmjernog dijela troškova održavanja i iskorištavanja vodovoda, a u slučaju ne zaključenja ugovora spor rješava nadležni sud.
- (3) Potpisivanjem ugovora iz prethodnog stava korisnik stiče pravo suvlasnika vodovoda.
- (4) Srazmjerni dio troškova se utvrđuje na osnovu relevantne dokumentacije za predmetni vodovod i određuje uz suglasnost nadležne službe za poslove vodoprivrede.
- (5) Cijena priključka ne smije biti veća od cijene priključka na gradski vodovod.
- (6) U izuzetnim slučajevima uz dostavljanje dokaza o visini troškova, cijena se može utvrditi u većem iznosu samo uz suglasnost nadležne Službe za poslove vodoprivrede.

Član 16.

- (1) Vlasnici/ korisnici vodovoda dužni su da plaćaju naknadu za utrošenu vodu.
- (2) Naknada za vodu isporučenu iz vodovoda ne može biti određena ispod iznosa koji osigurava pokrivanje nužnih troškova za održavanje i funkcionisanje objekata u skladu sa njihovom prirodnom namjenom i za vršenje minimalnog broja propisanih pregleda zdravstvene ispravnosti vode za piće iz tih objekata.
- (3) Odluku o načinu na koji se određuje nadoknada i visini naknade za utrošenu vodu donosi Odbor za upravljanje i održavanje vodovodom, uz saglasnost općinske službe nadležne za oblast voda.
- (4) Prikupljanje, odnosno naplata vrši se uplatom na podračun otvoren za potrebe Odbora za upravljanje i održavanje vodovodom do 15.tog u mjesecu za prethodni mjesec, a može se vršiti i neposrednim prikupljanjem u gotovini koje obavlja lice ovlašteno od strane Odbora za upravljanje i održavanje vodovoda, uz obavezno izdavanje odgovarajuće priznanice. Sredstva prikupljena u gotovini se u roku od osam (8) dana uplaćuju na podračun otvoren za potrebe Odbora za upravljanje i održavanje vodovoda.
- (5) Sredstva prikupljena po osnovu naknade za utrošenu vodu su namjenska i mogu se koristiti samo na osnovu odluke Odbora za upravljanje i održavanje vodovodom.
- (6) Izvještaj o prikupljenim sredstvima kao i izvještaj o utrošenim sredstvima Odbor za upravljanje i održavanje vodovodom podnosi vlasnicima/korisnicima u rokovima predviđenim u aktu o imenovanju, a općinskoj službi za oblast voda jednom godišnje.

- (7) Nadležna općinska služba podnosi Općinskom vijeću izvještaj o stanju u mjesnim vodovodima jednom godišnje.
- (8) Upravljanje i održavanje vodovoda je u nadležnosti Odbora za upravljanje i održavanje.

Član 17.

- (1) Aktom o imenovanju Odbora za upravljanje i održavanje vodovoda određuje se predsjednik i zamjenik i oni su ovlaštena lica za potpisivanje akata i zaključivanje ugovora čije donošenje je neophodno u funkciji upravljanja i održavanja vodovoda.
- (2) Upravljanje vodovodom podrazumjeva odlučivanje o svim pitanjima koja se tiču vodovoda, a naročito o:
 - priključivanju pravnih i fizičkih lica građana koji nisu učestvovali u izgradnji na izgrađeni vodovod,
 - visini naknade za priključak na vodovod,
 - visina naknade za utrošenu vodu,
 - održavanje vodovoda od vodozahvata do vodomjernog šahta,
 - kontrolu namjenskog i racionalnog korištenja vode iz vodovoda,
 - vođenje evidencije o svim korisnicima vodovoda, naplati sredstava za utrošenu vodu, o mjerama i radnjama za održavanje vodovoda,
 - drugim pitanjima od značaja za funkcionisanje vodovoda.
- (3) Održavanje vodovoda podrazumjeva:
 - održavanje i popunjavanje rezervnih dijelova u potrebnoj količini,
 - popravak pojedinih dijelova ili objekata,
 - redovni pregled ili remont pojedinih dijelova ili objekata,
 - zaštitu vodovoda od zagađivanja,
 - održavanje vodomjera,
 - obezbjeđenje higijenske ispravnosti vode,
 - održavanje zona sanitarne zaštite izvorišta.

Član 18.

- (1) Mjesni vodovodi mogu se uz suglasnost njihovih korisnika predati na upravljanje komunalnom preduzeću.
- (2) Zahtjev iz prethodnog stava se podnosi putem općinske službe nadležne za poslove iz oblasti voda.
- (3) Cijene vode vodovoda koji su predati na upravljanje komunalnom preduzeću predlaže komunalno preduzeće, a usvaja Općinsko vijeće Općine Vareš.

Član 19.

- (1) Upravljanje i održavanje javne česme i javnog bunara čiji su investitori grupe građana ili građanin je u nadležnosti mjesne zajednice koja je dala suglasnost za izgradnju istih.
- (2) Izgradnja, korištenje, upravljanje i održavanje javne česme i javnog bunara vrši se u skladu sa ovom odlukom.

IV- ZAŠTITA IZVORIŠTA VODOVODA, JAVNE ČESME I JAVNOG BUNARA

Član 20.

- (1) Zaštita izvorišta mjesnih vodovoda vrši se uspostavljanjem i održavanjem zona sanitarne zaštite u skladu sa odredbama Zakona o vodama („Službene novine Zeničko-dobojskog kantona“, broj:17/07) i Pravilnika o načinu određivanja uvjeta za određivanje zona sanitarne zaštite i zaštitnih mjera za izvorišta vode za javno vodosnadbjevanje stanovništva („Službene novine Federacije BiH“, broj: 88/12).

Član 21.

- (1) Do donošenja odluke za zaštitu izvorišta, u skladu sa važećim propisima iz oblasti voda, uspostavlja se privremena zaštita svih izvorišta u radijusu od 50(pedeset) metara od postojećeg vodozahvata.
- (2) Odbor za upravljanje i održavanje vodovoda obavezan je uspostaviti privremenu zaštitnu zonu nakasnije u roku od 6 (šest) mjeseci od dana na stupanja na snagu ove odluke.
- (3) Na području I zaštitne zone izvorišta, zabranjene su sve aktivnosti koje nisu u direktnoj vezi sa normalnim radom i održavanjem vodozahvatnih objekata.
- (4) Aktivnosti koje se provode u cilju normalnog rada i održavanja vodozahvatnih objekata ne smiju štetno djelovati na izvorište.
- (5) Objekte koji pored vodozahvata imaju izgrađene i rezervoare potrebno je zaštititi postavljanjem ograde (bodiljkava žica) u prečniku od 10 metara sa betonskim stubovima minimalne visine 2 metra i sa 12 redova žice.
- (6) Prečnik postavljanja ograde se može u izuzetnim slučajevima i smanjiti uz suglasnost općinske službe nadležne za oblast voda.

Član 22.

- (1) Zabranjeno je neovlaštenim licima otvaranje i zatvaranje armatura, instalacija, hidranata i ostalih uređaja vodovoda, izuzev u slučajevima kada je to nužno u cilju sprečavanja šteta većih razmjera.

V -SANITARNO-HIGIJENSKE MJERE

Član 23.

- (1) Pravno lice ili mjesna zajednica kome je povjereno upravljanje mjesnim vodovodima odgovara za pravilnu primjenu svih propisa i sanitarno-tehničkih mjera kojima se dostiže propisani kvalitet vode iz vodovoda.
- (2) Ukoliko je dnevna količina zahvaćene vode iz vodovoda do 100 m³, pregled zdravstvene ispravnosti vode za piće vrši se minimalno jednom godišnje.
- (3) Ukoliko je dnevna količina zahvaćene vode iz vodovoda veća od 100 m³, pregled zdravstvene ispravnosti vode za piće vrši se minimalno četiri puta godišnje.
- (4) Pregled zdravstvene ispravnosti vode za piće može vršiti samo ovlašteno pravno lice.
- (5) Kopija nalaza od zdravstvene ispravnosti vode za piće dostavlja se općinskom sanitarnom inspektor, najkasnije u roku od 7 (sedam) dana od dana prijema nalaza.
- (6) Odbor za održavanje i upravljanje vodovodom dužan je postupiti prema naloženim mjerama sanitarnog inspektora o poduzimanju mjera za zdravstvenu ispravnost vode za piće.

Član 24.

- (1) Za članove Odbora za vodu i održavanje neophodno je obezbjediti zdravstvene preglede dva puta godišnje (sanitarne knjižice).

VI-EVIDENCIJA O MJESNIM VODOVODIMA;JAVNIM BUNARIMA I JAVNIM ČESMAMA

Član 25.

- (1) Nadležna općinska služba dužna je da ustroji u roku od 90 dana od dana stupanja na snagu ove Odluke evidenciju o mjesnim vodovodima, javnim bunarima i javnim

česmama, kao i da tu evidenciju trajno vodi, te da blagovremeno registruje sve promjene vezane za mjesne vodovode, javne bunare i javne česme.

Član 26.

- (1) Evidencija iz prethodnog člana naročito sadrži podatke o:
- nazivu mjesnog vodovoda ili javnog bunara, -naselju, odnosno mjesnoj zajednici,
 - broju i datumu izdavanja vodoprivredne saglasnosti,
 - broju i datumu izdavanja odobrenja za građenje,
 - broju i datumu izdavanja vodoprivredne dozvole,
 - broju i datumu izdavanja upotrebne dozvole,
 - broju i datumu izdavanja sanitarne saglasnosti,
 - broju domaćinstava koja koriste mjesni vodovod, odnosno javni bunar- broju naknadno priključenih domaćinstava na mjesni vodovod.

VII- MJERE ZA PROVOĐENJE OVE ODLUKE

Član 27.

- (1) Inspeksijski nadzor nad sprovođenjem odredaba ove Odluke vrši općinska sanitarna inspekcija i vodna inspekcija.
- (2) Inspektori u izvršavanju poslova inspeksijskog nadzora poduzimaju upravne radnje u skladu sa Zakonom o inspekcijama Zeničko-dobojskog kantona, Zakona o vodama Zeničko-dobojskog kantona i ovom odlukom.

VIII- KAZNENE ODREDBE

Član 28.

Novčanom kaznom u iznosu od 1.000,00 KM do 5.000,00 KM bit će kažnjen za prekršaj predsjednik i članovi Građevinskog odbora ako:

- ne provede proceduru i ne pribavi sve zakonom propisane akte potrebne za izgradnju, odnosno rekonstrukciju vodovoda-član 8.
- ne organizuje potpisivanje ugovora iz člana 8.
- ne vodi blagovremenu evidenciju o učešću u izgradnji svakog pojedinca, prikupljenim i utrošenim novčanim sredstvima i drugim pitanjima bitnim za izgradnju i kasnije korištenje objekta-član 8.
- nakon završetka radova ne podnese pismeni izvještaj investitoru koji ga je izabrao i svu raspoloživu dokumentaciju ne preda Odboru za upravljanje i održavanje- član 8.
- ne obavlja ostale poslove koji su mu dati u nadležnost ovom odlukom i aktom o imenovanju-član 7. i 8.
- ne postupi po rješenju inspektora.

Član 29.

Novčanom kaznom u iznosu od 1.000,00 KM do 5.000,00 KM bit će kažnjen za prekršaj predsjednik i članovi Odbora za upravljanje i održavanje vodovoda ako:

- vodovod ne održava u funkcionalnom stanju i ne koristi u skladu sa njegovom prirodom i namjenom- član 17.
- ne donese odluku o načinu na koji se određuje naknada i visini naknade za utrošenu vodu, uz saglasnost općinske službe nadležne za oblast voda- član 17.

- sredstva prikupljena po osnovu naknade za utrošenu vodu koristi ne namjenski- član 17.
- izvještaj o prikupljenim sredstvima ne podnese vlasnicima/korisnicima vodovoda i nadležnoj općinskoj službi- član 16.
- u periodu hidrološkog minimuma ne donese odluku o uvođenju redukcije-član 14.
- ne uspostavi privremenu zaštitnu zonu u propisanom roku-član 17.
- ako ne osigura stalni i sistemski pristup pregleda vode i ne poduzima mjere za osiguranje zdravstvene ispravnosti vode-član 17.
- ne dostavlja sanitarnom inspektoru dokaze o analizi vode-član 23.
- ako ne obezbjedi zdravstveni pregled i vaspitanje za članove koji se brinu o održavanju vodovoda-član 24.
- ne postupi po rješenju inspektora.

Član 30.

Novčanom kaznom u iznosu od 200,00 KM do 1.000,00 KM kazniti će se za prekršaj odgovorno lice u mjesnoj zajednici ako ne obezbjedi održavanje javne česme i javnog bunara, čiji je investitor grupa građana ili građanin, a koji su izgrađeni uz saglasnost mjesne zajednice-član 19.

Član 31.

Novčanom kaznom u iznosu od 100,00 KM do 1.000,00 KM biti će kažnjen za prekršaj fizičko i pravno lice-korisnik vode, kao i drugo fizičko i pravno lice ako:

- licu kojem je vodnom dozvolom odobren priključak na vodovod i korištenje vode sa tog vodovoda ometa priključenje na vodovod ili mu ometa snadbjevanje vodom iz vodovoda- član 15.
- ne plaća ili ne plaća u propisanom roku naknadu za utrošenu vodu- član 16.
- vodu koristi neracionalno i neekonomično- član 15.
- u periodu smanjenja ili nestašice vode, vodu ne koristi u skladu sa odlukom o ograničenom korištenju vode, odnosno korištenju vode isključivo za određene potrebe-član 14.
- neovlašteno crpi otvaranje i zatvaranje armature, instalacija, hidranata i ostalih uređaja vodovoda, izuzev kad je to nužno u cilju sprečavanja šteta većih razmjera- član 22.
- ošteti instalacije i objekat javne česme i javnog bunara- član 19.
- ne postupa u skladu ili postupa suprotno ostalim odredbama ove odluke
- ne postupi po rješenju inspektora.

IX- PRELAZNE I ZAVRŠNE ODREDBE

- (1) U mjesnim zajednicama u kojima nije imenovan odbor za upravljanje i održavanje vodovoda Savjet Mjesne zajednice je dužan imenovati isti u roku od mjesec dana od dana stupanja na snagu ove odluke.

**PREDSJEDAVAJUĆI
OPĆINSKOG VIJEĆA**

Malik Rizvanović

Odluka objavljena na oglasnoj tabli Općine Vareš, _____ .2025.godine.

OPĆINSKI NAČELNIK

Zdravko Marošević

OBRAZLOŽENJE

1-PRAVNI OSNOV

Pravni osnov za donošenje Odluke o mjesnim vodovodima na području općine Vareš sadržan je u odredbama:

1. Zakon o principima lokalne samouprave („Službene novine Federacije BiH“, broj: 49/06 i 51/09): Jedinica lokalne samouprave ima vlastite nadležnosti ustanovljene ustavom i zakonom, i ima pravo baviti se pitanjima od lokalnog značaja koja nisu isključena iz njene nadležnosti, niti dodjeljena u nadležnost neke druge vlasti na osnovu ustava i zakona. U vlastite nadležnosti jedinice lokalne samouprave pored ostalog spada poduzimanje mjera za osiguranje higijene i zdravlja kao i zaštita životinja (član 8).
2. Statut Općine Vareš (Prečišćeni tekst), broj: 01-162/12 od 11.09.2012. godine: Općinsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Općine Vareš (član 22).
3. Zakona o vodama (Službene novine Zeničko-dobojskog kantona, broj: 17/07): Vodni objekti iz člana 9. stav (1) tačka 3. alineja 1. i tačka 4. ovog zakona što su ih za svoje potrebe izgradila pravna ili fizička lica u njihovom su vlasništvu i ona brinu o upravljanju tim objektima. Vodni objekti iz člana 9. stav (1) tačka 3. alineja 1. ovog zakona koji služe za snabdijevanje vodom za piće naselja izvan općinskih sjedišta su mjesni vodovodi, javne česme i javni bunari. Vlasnici mjesnih vodovoda dužni su da obezbjeđuju tekuće investiciono održavanje objekata mjesnog vodovoda, sredstava za amortizaciju i troškove propisanih pregleda o zdravstvenoj ispravnosti vode za piće. Cijena vode isporučene iz mjesnog vodovoda ne može biti određena ispod iznosa koji osigurava pokrivanje troškova iz stava (6) ovog člana. Vodni objekti iz člana 9. stav (1) tačka 4. ovog Zakona na području izvan općinskih sjedišta su u vlasništvu građana koji su ih izgradili za svoje potrebe i dužni su da obezbijede finansijske i organizacione uslove za održavanje i funkcioniranje tih objekata.(član 12).
4. Zakon o zaštiti stanovništva od zaraznih bolesti (Službene novine Federacije BiH 29/05): Opće mjere za sprečavanje i suzbijanje zaraznih bolesti su: 1. osiguranje higijenski ispravne vode za piće, kao i sanitarna zaštita izvorišta, objekata i uređaja koji služe za snabdijevanje vodom za piće; 5. vršenje obavezne (preventivne) dezinfekcije, dezinsekcije i deratizacije u: objektima za snabdijevanje vodom za piće (član 10)
Pod zdravstveni nadzor stavljaju se osobe: 1. koje obavljaju poslove u proizvodnji ili prometu namirnica ili snabdijevanju stanovništva pitkom vodom, a koje na svojim radnim mjestima dolaze u dodir sa namirnicama, odnosno sa pitkom vodom (član 30).

II- RAZLOZI ZA DONOŠENJE

Razlozi za donošenje ove odluke proizilaze iz potrebe da se sa propisima Općine Vareš urede značajna pitanja iz oblasti vodosnadbjevanja, kao i način izgradnje mjesnih vodovoda, javnih bunara i javnih česmi, njihovo upravljanje i korištenje, zaštita i održavanje na području Općine Vareš.

Ovo se naročito odnosi na odredbe Zakona o vodama Zeničko-dobojskog kantona, odnosno članove 114.stav3, 116., stav 2, 134. stav 2, te odredbe Pravilnika o načinu određivanja uvjeta

za određivanje zona sanitarne zaštite i zaštitinih mjera za izvorišta vode za javno vodosnabdjevanje stanovništva, odnosno člana 14. i 15., gdje je zbog činjenice stanja na terenu i djelimične provedbe legalizacije mjesnih vodovoda, financijske situacije stanovništva došla potreba za izradom Odluke o mjesnim vodovodima na području općine Vareš, kojom bi se riješila problematika izgradnje, upravljanja, korištenja, zaštite i održavanje vodovoda.

III- FINANCIJSKA SREDSTVA

Za provođenje ove odluke nisu potrebna financijska sredstva iz Budžeta Općine Vareš.

IV- DONOŠENJE AKTA

S obzirom da se radi o donošenju nove odluke na nivou općine shodno Zakonu o vodama Zeničko-dobojskog kantona („Službene novine Zeničko-dobojskog kantona“, broj: 17/07) predlaže se da predmetni akt bude razmatran u fazi nacрта.

**PREDLAGAČ:
OPĆINSKI NAČELNIK**

Zdravko Marošević